



Խ Մ Բ Ա Գ Ր Ա Կ Ա Ն

Ա Պ Ր Վ Ա Ծ Հ Ա Վ Ա Տ Ը

(Ղևոնդյանց և Վարդանանց տոների առթիվ)

Մեր լուսաբնակ հայրապետները, փետրվար ամսում, մեր եկեղեցական օրացույցի մեջ, գեղեցիկ մտածումն են ունեցել, մասնավոր կարևորությամբ համախմբելու Հայ Եկեղեցուն միայն հատուկ սզգային-եկեղեցական տոների շարքը, տոներ, որոնք սերտորեն կապված են հայ հավատի, հայ ժողովրդի ու հայրենիքի պատմության հետ:

Ամեն տարի, մեծ պահքից անմիջապես առաջ տոնախմբվող փետրվարյան այդ հանդիսությունները իրենց սզգային-եկեղեցական խորհրդով ու նշանակությամբ, հոգևոր արթնության, բարեպաշտության, եկեղեցական ուխտապահության և իրավ հայրենասիրության ուսանելի հանգրվաններ են մեր Եկեղեցու և ժողովրդի համար:

Տոների այս շարքը բացվում է հայրենի հողի վրա երկրորդ դարի կեսերին, Ա. Գրիգոր Լուսավորչից առաջ, նոր կրոնի համար նահատակված Սուքիասյան վկաների և Ոսկյան քահանաների մարտիրոսությամբ, «որք հաւատով յաղթեցին, զխաւար կուպաշտութեան վանեալ հերքեցին և զմահս իւրեանց կանգնեցին յերկրի աշտարակ հօր», — ինչպէս գրում է սրբազան շարականագիրը, ոգելով նրանց հիշատակը:

Մեր եկեղեցական օրացույցում նշված մյուս տոները վերաբերում են Ե դարի պատմական մեծ դեմքերին և իրադարձություններին:

Ե դարը հոգևոր, եկեղեցական, մշակութային և հայրենասիրության տեսակետից մեր պատմության բացառիկ և հերոսական

ժամանակաշրջաններից մեկն է հանդիսանում, որն իր անջնջելի կնիքն է դրել մեր հետագա ողջ պատմության վրա:

Իարաշրջանի սկզբներին Հայաստանում ստեղծվել էր հոգևոր-մշակութային աննախընթաց մի շարժում, պայքարելու հանուն Հայ Եկեղեցու և հայ մշակույթի ինքնուրույնության: Այդ ճակատագրական, ծանր պայքարը առաջ էր տարվում մեծ եռանդով, կրքոտությամբ, բայց խաղաղ ճանապարհով, դպրությամբ, քարոզչությամբ, մշակույթով:

Այդ շարժման ու պայքարի ղեկավարը, կազմակերպիչը և ոգին Ս. Սահակ հայրապետն էր, հայրենասեր և լուսամիտ «պարթևական տեսանող»-ը, որի ջերմ շունչի տակ հասակ առան, կազմակերպվեցին իրենց ապագա առաքելության և գործի համար թարգմանիչների սերունդը և Վարդանանց հերոսները:

Երկրորդ տոնը ուրեմն նվիրված է մեծ հայրապետի հիշատակին, որպես Ե դարի սզգային-եկեղեցական իրադարձությունների կենտրոնական դեմքի, թեև հունիս ամսին մեր Եկեղեցին նշում է «Սրբոց թարգմանչացն մերոց Սահակայ և Մեսրոպայ» տոնը, միասին:

Երրորդ տոնը նվիրված է Աստու Գևուհի, Մանանդիս Ռշտունի իշխաններին և նրանց զնդերին, շուրջ 500 հոգու նահատակության հիշատակին: Օրացույցում և մեր եկեղեցական մատենագրության մեջ հայրենիքի և հավատի այս անձնուրաց նահատակները ծանոթ են «Ատովմեան գորավարք» անվան

տակ: Ատովմյանց նահատակությունը տեղի է ունեցել Ե դարում, Հագլերտի հրամանով, Վարդանանց պատերազմից երկու տարի առաջ, 449 թվականին, Անձնացյաց և Ռշտունյաց զավառներում: Ատով գորավարի հետ նահատակվել են, ըստ մեր վկայաբանության, որդին՝ Վարս Գնունի, Վարս Ոստանիկ, Ներսեհ Երվանդունի, Վարձավոր Արծրունի և ուրիշ իշխաններ: Իսկ Մանահիրի հետ նահատակվել են մի շարք կվաներ, որոնցից ոչ ոք անվամբ չի հիշվում վկայաբանության մեջ:

Փետրվար ամսում նշվող մեր ազգային եկեղեցական տոների մեջ առանձնահատուկ տեղ է գրավում Ե դարի հիսունական թվականներին նահատակ հայ հոգևորականների հիշատակին նվիրված հանդիսությունը, որոնք ծանոթ են «Սուրբ Ղևոնդեանք քահանայք» անվամբ:

Ղևոնցյանց քահանաների նահատակությունը սերտորեն կապված է 451 թվականի Վարդանանց հերոսամարտի պատմության հետ:

Ղևոնդյանք նահատակվեցին 454 թվականին, հուլիսի 31-ին, Ապար աշխարհի Ռևան գյուղի մոտ, Վարդանանց պատերազմից երեք տարի հետո:

Ս. Ղևոնդյանք, նահատակ քահանաների այդ լուսե փառանգը, Հայ Եկեղեցու պարծանք սրբերն են, «սխտեանք Եկեղեցույ», որոնց նահատակությամբ «պայծառապես զարդարեցան եկեղեցիք Հայաստանեայց»:

«Ղևոնդյանց վրա կանձնավորվի հայրենիքի և հավատքի նվիրումին գաղափարը: Վարդանանց ընկեր և քաջալերող, ժողովորդին կյանքին մեջ բարձր պահեցին կրոնքի սրբությունը, և ամենեն ակնավոր գործիչները եղան անոնք Հայ Եկեղեցիով հայ ազգությունը սպրեցնելու և պահպանելու սկզբունքին» (Սուրբք և տոնք», էջ 215):

Նահատակված հոգևորականների մեջ էին Հովսեփ կաթողիկոս Հողոցմեցին (Վայոց ձոր), Ռշտունյաց Սահակ եպիսկոպոսը, Վանանդեցի Ղևոնդ երեցը, Աղբակեցի Մուշե երեցը, Բագրևանդացի Արշեն երեցը, Արարատեցի Սամվել երեցը (Արած գյուղից), Քաջաջ սարկավազը (Ռշտունիքից), Աբրահամ սարկավազ Արարատեցին (Արած գյուղից) և պարսիկ դեմախոր (Նյուշապուրի քաղաքից): Հայրենասեր նահատակ հոգևորականները պատմության անցան որպես Ղևոնդյանք, Վանանդեցի Ղևոնդ երեցի անունով, որը բոցավառ և հոգեվից եկեղեցական էր, թե՛ խոսքով և թե՛ գործով, «Աւարայրի արծիւ, այրն հաւատարիմ և ճշմարտապաշտ, լուսատրիչն ամենեցուն

Ղևոնդի՛», սուրբ վարդապետն, ծառայեալ լոյս գիտութեան յոգիս արանց կատարելոց»:

Ս. Ղևոնդյանց լուսապաշտ անունն ու սուրբ հիշատակը, որպես հայ հավատի քաջարի նահատակների և հայրենասեր հոգևորականների, նվիրական և թանկ են եղել մեր Եկեղեցու պատմության ողջ ընթացքում:

Ղևոնդյանց անձնուրաց նահատակությունը, մահվան դեմ քրիստոնեական խիզախումը խորունկ ներշնչման և խիզախության անսպառ աղբյուր են հանդիսացել մեր հոգևորական ապագա սերունդների համար. նրանց անձնագոհությունը նոր թափ, նոր լիցք է տվել հայ հոգևորականությանը՝ ծառայելու և ի պահանջել հարկին նահատակվելու հանուն այն սրբությունների և վեհ գաղափարների, որոնց համար մեռան Ղևոնդյանք, որպեսզի ապրեն Հայ Եկեղեցին և հայ ժողովուրդը:

Հիշատակելի և փառավոր ուղի է անցել հայ հոգևորականությունը Ե դարից մինչև մեր օրերը:

Ս. Ղևոնդյանց արժանավոր հաջորդները, մեր սուրբ հայրապետներն ու ետևած վարդապետները պայծառ ու խորունկ գիտակցությունն են ունեցել քրիստոնեական պատվիրանների և ազգային սրբությանց, որոնց հաղթանակի համար մի վայրկյան իսկ չեն վարանել զոհելու իրենց կյանքը: «Ոչ ի կապանաց զանգիտեն և ոչ ի գագանաց երկնչին...», զմահ քան զկեանս ընտրեն: Այն ոգին դարերի հետ, որպես սրբազան ժառանգություն, կրակե կտակն է եղել հայ հոգևորականության:

Փետրվար ամսվա մեջ, վերջին համազգային տոնը Վարդանանց պատերազմի հիշատակին և խորհրդին նվիրված եկեղեցական և ազգային հանդիսությունն է:

Օրացույցում այս ազգային տոնը նշվել է այսպես. «Սրբոց Վարդանանց զօրավառացն մերոց հազար երեսուն և վեց վայրիցն, որք կատարեցան ի մեծի պատերազմի»:

Պատերազմը տեղի է ունեցել 451 թվականի գարնանը, մայիսի 28-ին, Ծավարշան գյուղում, Տղմուտ գետի ափին, Ավարայրի դաշտում, ուր հերոսի մահով ընկան 1036 քաջարի մարտիկներ, նաև «նախարարք և զօրավարք»:

Ոսկեգրիչ Եղիշե պատմիչը իր հայրենաշունչ դյուցազներգության՝ պատմություն «Վասն Վարդանայ և Հայոց պատերազմին» աշխատության մեջ, որն ընդգրկում է 35 տարիների մի ժամանակաշրջան (428—

464), տվել է անունները Ավարայրի ճակատամարտում Եկեղեցու և հայրենիքի սեղանի վրա պատարագված 9 զորավարների. քաջն Վարդան, Մամիկոնյանց տոհմից, հայոց սպարապետ և «զօրագլուխ առաքինեաց»՝ 133 քաջերով. կորովին Խորեն Խոռխոռունի՝ 19 ընկերներով. Պալունյաց քաջն Արտակ՝ 57 ընկերներով. զարմանալին Տաճատ, Գնթունյաց տոհմից՝ 19 մարտիկներով. Դիմաքայան տոհմից իմաստունն Հմայակ՝ 22 ընկերներով. հրաշակետուն Ներսեհ Քաջբերունի՝ 7 ընկերներով. մանուկն Վահան Գնունի՝ 3 ընկերներով. Ընծայեցի արդարն Արսեն՝ 7 ընկերներով և Սրվանձտյանց տոհմից առաջադեմն Գարեգին՝ իր երկու եղբայրներով և 18 ընկերներով. և այլ քաջեր, մնացած ամբողջ խումբը, «զինուորք Հայոց Աստուծուն», «որք գրեցին զանուանս իրեանց ի դարութեան կենաց և հեղին զարիւնս իրեանց ի նորոգումն Եկեղեցու»:

1500 տարիներ մեզ բաժանում են Ղևոնդյանց և Վարդանանց ծանր, հերոսական օրերից:

Վարդանանց պատերազմը մի պայքար էր հանուն լույսի, հավատի, հայրենիքի և ազատության:

Հազկերտի կրոնական մոլեռանդության և բռնակալության դեմ ծառայած հայ ժողովուրդը իր կրոնա-բարոյական բարձր գաղափարներով, ազգային, հայրենասիրական ոգով:

«Յայսմ հաւատոց զմեզ ոչ ոք կարէ խախտել...»:

Հայությունը Ավարայր իջավ հավերժորեն ապրելու, «մահումսբ զմահ կոխել»-ու համար:

«Քաջութեամբ միայն մեռուք, զանուն և զոգիս կեթ ծառանգեսցուք, բայց միայն յարությունս քաջութեան վատություն մի՛ խառնեսցուք»: Ռազմի դաշտում եկեղեցական ուխտապահությունն ու հայրենասիրությունը իրար էր բերել բոլորին, դարձրել մի սիրտ և մի հոգի: Բոլորն էլ հավասարապես լցված էին արիական ոգով և պատրաստ «ի մեռանել և ի սպանանել, զի բարձրացի կողմն ճշմարտութեան և մի՛ քակտեսցի ուխտն հաւատոց մերոց»:

Քրիստոնեությունը եղավ հայ ժողովրդի իդեալը, նրա ազգային նկարագիրը, մտածման ձևը, ապրելու կերպը:

Սխալվեցին Հազկերտները բոլոր դարերի, որոնք կարծում էին, թե «իբրև զհանդերձ ունել մեզ քրիստոնեություն»:

Ավարայրից հետո հայոց պատմության հետագա դարերը, իբր ներշնչարան, թելադրանք և տեսիլք ունեցան քրիստոնեական այդ կենարար ոգին և շունչը: Սեր ժողովրդի և Եկեղեցու կյանքի ուղին լուսավորվեց Ղևոնդի և Վարդանի հավատով և օրհակով: Քրիստոնյա մնալու և հայ ապրելու համար, մեր ժողովուրդը տվեց իր ամենաթանկագին գանձը՝ «գոյի շափ զկեանս իր»:

«որքան ճշմարտություն կա այն հաստատման մեջ, ըստ որի քրիստոնյա Արևմուտքը աստվածաբանական դպրոցներ ստեղծեց, դավանաբանական վեճեր բորբոքեց, մինչ հայ ժողովուրդը ապրեց քրիստոնեությունը և իր կյանքով ապրեցրեց Ավետարանի ճշմարտությունները. «զի գիրն սպանանէ, այլ ոգին կեցուցանէ»:

Աստեղ է մեծությունը, վեհությունը Ղևոնդյանց նախատակության և Վարդանանց հերոսամարտի: Դ դարի սկզբներին, հազիվ ազգորեն, պետականորեն իր հոգին բացած քրիստոնեության լույսին, հայ ժողովուրդը հարյուր տարի հետո, Ե դարում, գիտակցորեն և մասամբ էլ տարերայնորեն դիսադրեց և պաշտպան կանգնեց իր խղճի ազատության, ազգային ավանդություններին, ոգիին, բարոյական, իմացական ըմբռնումներին և սկզբունքներին:

Արայրը, քրիստոնեական լույսին բացված, Սահակ-Սեպրոպյան հրաշքի մեջ պայծառացած, հայ հոգու, հայ մտքի գաղափարական բարձունքն է, Հայ Եկեղեցու հերոսացումը և քրիստոնյա հայ ժողովրդի հավաքական սրբացումը:

սօր էլ Ղևոնդյանք և Վարդանանք մեզ համար հանդիսանում են հավատի, հայրենասիրության, տեսիլքի և խոյանքի ներշնչարաններ, լույսի սերմնացաններ, ապրված համոզմունքների գերազանց տիպարներ:

Այրենք Ղևոնդյանց և Վարդանանց ոգով ու տեսիլքով, և ապրեցնենք նրանց հավատն ու հայրենասիրությունը մեր կյանքի մեջ, մեր գործերի մեջ:

Այս է մեր սրբերի, նախատակների եկեղեցական ուխտապահության և հայրենասիրության պատգամն ու թելադրանքը:

